

Hautetsien Biltzarrak garapen proiektuak aztertu ditu

L. F. / BAIONA

Euskal Herriko 65 hautetsi biltzen dituen Hautetsien Biltzarrak lehen biltzar nagusia egin zuen joan den astelehenean Baionan. Egitura sortu zen Euskal Herria 2010 desmartzaren ondotik Garapen Kontseiluarekin batera eta lehen bilkura Uztaritzen egin zuen joan den primaderan.

Hautetsi gehienak berriro bildu ziren joan den astelehenean Administrazio Kontseiluko kideak izendatzeko eta bulegoa hautatzeko. Lehendakaria Jean Jacques Lasserre Erregioko kontseilaria izanen da, Jean Grenet eta Daniel Poulou bi lehendakariordeak, Cabrol idazkaria eta M. Beguerie diruzaina. Bestalde, Garapen Kontseiluan parte hartuko duten 15 hautetsi hautatu zituzten bildutako lagunek, baita zuzendaritza komitean izanen diren 5 hautetsi ere.

Alabaina, puntu garrantzitsuenak ondotik aipatu zituzten hautetsiek, lehen aldikotz Euskal Herriko antolakuntzaren plangintza eta Europako Leader programan parte hartzea eztabaidatu baitzuten. Antolakuntzaren Plangintza aztertzeko printzipioa aho betez onartu dute hautetsiek eta lan taldea osatuko dute datozen egunetan «lurralde antolakuntza egokia pentsatzeko», Peio Olagarai Garapen Kontseiluko zuzendariak azpimarratu zenez. Taldeak epe luzea hartuko du azterketa sakona egiteko eta bere emaitzak 1996ko urrian plazaratuko ditu. Leader programari dagozkionez, Hautetsien Biltzarrak eskatu dio Europari 10 milioi liberako dirulaguntza berezia lau proiektu bultzatzeko.

Gurutze Iantziren familiak ikerketa ez artxibatzeke eskatu dio Gorenari

Tratu txarren aztarnak daudela berretsi du akusazio partikularrak


Gurutze Iantziren heriotza ikertzeko eginbideak artxibatu izanaren aurkako errekurtoa aztertu zuen atzo Espainiako Auzitegi Gorenak. Familiak auzia epaiketara helarazi nahi du. Kepa Landa abokatuak berretsi egin zuen Iantzik buruan, besoan eta bularrean zituen ubeldurak ezin direla justifikatu medikuak egindako masajeen bidez.

MADRIL

Akusazio partikularrak Auzitegi Gorenera eraman zuen atzo Gurutze Iantziren heriotzaren ikerketa artxibatzeke erabakia. Argibide epaitegiak lehenengo eta Madrilgo Auzitegi Probintzialak gero ikerketa ixtea erabaki zuten. Auzia artxibatzen badute, Landaren iritziz, «ezingo da epaiketa egin, eta ondorioz, pertsona batzuk gertakizun hauengatik izan ditzaketen erantzukizunengatik ezingo ditugu akusatu».

Epaia zain geratu den errekurtoa aurrera egingo bala, auzia berriz irekiko litzateke, bestela artxibatua geratuko litzateke.

«Gurutze Iantziren heriotzean bi gauza argi gertatu ziren: batetik, Goardia Zibilaren egoitzara erabat sano sartu eta hilda irten zela, eta hortaz, heriotza horren zergatiak ikusi beharko lirateke eta, bestetik, heriotza bertan jasandako tratu txarren ondorio dela demostratzea zaila izango balitz ere, nabarmena dena da emakume honek ubeldurak zi-



Kepa Landa, Iantziren familiaren abokatuak.

XOUSE SIMAL

tuela gorputzean, bat bularrean, beste bi buruan eta beste bat besoan». Kepa Landaren ustez, ubeldura horiek ezin gerta zitezkeen epaitegiak emandako azalpenen arabera. «Epaitegiek onartu duten tesia da bazegoela bihotzeko masajea, baina masaje hori ematen duen medikuaren arabera Gurutze Iantzi hilda zen ordu erdi lehenago, gainera ubeldurak heriotza baino lehenago koak dira. Eman daitezkeen datu zehatz ugariak kolokan jartzen dute auzia artxibatzeke erabakia egokia dela», gaineratu zuen letratua.

TRATU TXARRAK EPAITU

Landaren ustez «epaiketak balioko luke demostratzeko Gurutze Iantzik tratu txarrak jasan zituela eta auzipetzeko, besterik ez bada, tratu txar horiek

gerta zitezen saihestu ez zuten goardiak». Landak oso zailtzat jo zuen egileak nortzuk izan ziren frogatu ahal izatea.

Goardia Zibilak 1993ko irailaren 23an atxilotu zituen Urnietan Gurutze Iantzi eta bere senarra Julio Iglesias Zamora biltzeko operazio zabal batean. Hurrengo egunean, ostiral goizaldean, hil zen Goardia Zibilak Tres Cantosko (Madril) komandantzia atxilotua zeukala. Bertsio ofizialaren arabera ospitalerako bidean hil zen 31 urteko urnietarra.

Gurutze Iantziren alargunak, behin eta berriro azaldu zuen bere emazteak sekula ez zuela izan bihotzeko inolako gaixotasunik hil aurretik. Julian Irastorzak berak Goardia Zibilaren esku torturak jasan izana salatu zuen.

Donostiako Entzutegiak berretsi egin du Juan Maria Olanoren absoluzioa

P. A. / DONOSTIA

Donostiako Entzutegiak berretsi egin du Juan Maria Olanoren absolbituz Penaleko Epaitegiak 1994ko abenduan eman zuen epaia. Epai horren kontrako errekurtoa jarri zuen fiskalak, baina Entzutegiak atzera bota du orain.

Juan Maria Atutxa Barne sailburuaren kontrako desmen delitua leporatu zioten Olanori, Amnistiaren Aldeko Batzordeetako ordezkariari. Honek, «kutsu faxistako ahobero», «liskarti» eta «auzoko harroputzen hizkera erabiltzen duen superpolizia» deitu zion 1992ko ekainean, Barne sailburuak bezperan egin zituen adierazpen batzuk zirela eta. Atutxak presoek bergizarte-

ratzea ez onartzeko presio egitea leporatu zien senideei, eta ondorengo esaldia gaineratu zuen: «Itxuraz normalak diren familiek 17 urteko alabak kartzeletara eramaten dituzte *vis à vis* -a egin dezaten».

Bere garaian Donostiako Penaleko Epaitegiak egin zuen bezala, Entzutegiak ebatzi du Olanoren adierazpenak bere inguruan aztertu behar direla. Honek, deklarazio horiek egin zireneko egoera gogoratu du Ane Maite Loiola Iriondo epaimahaiko bokalak: lehenik, Atutxak egin zituen deklarazioak; eta, ondoren, euskal presoen sakanaketaren inguruan gizartean zegoen eztabaida. Arantzazuko monasterioan (Gipuzkoa) presoen senideak gose greban

zeudela erantzun ziola Olanok Atutxari nabarmentzen du epaiak.

«Kritika politikoaren barruan» sartu ditu epaileak ABB-etako kidearen deklarazioak. «Informazioarako askatasuna diskurtso politikoaren esparrura eramaten denean, kritika mugak bere hedadura handiena hartzen du», dio Loiola Iriondok.

Olanoren desmen delituagatik kondena zezaten eskatu zuen fiskalak bere errekursoan, eta bi hilabeteko arrestatzea eta 200.000 pezetako isuna jar ziezaiotela zigortzat. Luis Blázquez Perez, Antonio Giménez Pericas eta Loiola Iriondok osatutako epaimahaiak ez du eskaera onartu.

'Iribarren auzia' artxibatzea desegokitzat jo du Entzutegiak

IRUNEA

Mikel Iribarrenek jasotako zauriei buruzko azken epaia —eginbideak bertan behera utzi zituztena— atzera bota du Nafarroako Entzutegi Probintzialak. 1991ko abenduaren 15ean izandako istiluetan, Poliziak hurbiletik botatako ke-poteak oso zauri larriak eragin zituzten Mikel Iribarren gazte iruindarrari.

Atzoko epaian, Entzutegiak desegokitzat jo zuen eginbideak artxibatu izana, lesio-delitua izan zela frogaturik baitago. Hala ere, delitua egin, lagundu edota babestu zuen inor akusatzeko arrazoirik ez dela uste du Nafarroako Entzutegi Probintzialak.

Ebazpenak azken epaiaren zati bat besterik ez du atzera bota; hau da, herri akusazioak jarritako apelazio errekursoaren zati bat besterik ez du onartat hartu. Auzitegiak eginbideak bertan behera uztea ebatzi ondoren, Mikel Iribarren auzokideen eta adiskideen talde batek apelazio errekurtoa aurkeztu zuen.

AREko batzorde instituzionala Gasteizen bilduko da bihar

GASTEIZ

Europako Erregioen Biltzarreko (ARE) batzorde instituzionala Gasteizen bilduko da bihar Villa Suso jauregian. Guztira 60 ordezkari hartuko dute parte Europako 30 lurralde ordezkatzeko eta horien artean EAE izango da. Bileraren helburua Europako eraikuntzan erregioen zeregina aztertzen segitzea izango da. «Erregioen Europa baten alde» kanpaina abian jarri nahi dute AREko buruzagiek erakunde hau duela hamar urte sortu zela gogorarazteko. Gainera «Erregionalismoaren Gutuna» idatziko dute.

Maastricht-eko Ituna aldatzeko AREk egingo dituen proposamenak jorratuko dituzte, halaber. Urte amaieran, seguruenik, Ituna aldatzeko goi-bilera egingo dute Europako agintariek, eta AREko batzorde eragileak, proposamenak eginez, txostena prestatu du. Ardanza lehendakariak hasiera ekitaldia zuzenduko du.

ZENTRONIKOKO UDAL KANPINA

Aste Santuik Urrira arte zabalik



Bungalowak

Tutera, Bardeak, Moncayo
eta Fiterotik gertu.

ZATOZ ERRIBERARA!!!

DEITU: 948-81 24 77